

դարևած են ուռնենիների և բարդիների տնկարաններով, որոնց պատճառով էլ գիւղի այդ մասը ներկայացնում է գեղարւեստական մի հմայիչ պատկեր:

Ահա քո առաջ այդպիսի հրաշալի տեսարաններ է բաց անում Սվարան գիւղը, որ 311 տարւայ հիմնարկութիւն է. հարուստ է սառնորակ աղբիւրներով և արտերն ու արօտները ոռոգող առուներով, որոնք նշանակալից դեր են կատարում տնտեսական տեսակէտից: Բացի այդ՝ գիւղի արևելեան և արևմտեան փէշերից հոսում են երկու փոքրիկ գետակներ, նրանցից մէկն սկիզբ է առնում Քէլիզուց և Կէնջուց, իսկ միւսը՝ Ղանդահարից: Այս երկու գետակները ոլորապտոյտ հոսելով առատօրէն ոռոգում են Սվարանի գաշտավայրերը, ապա գրկախառնւելով կտրում Սվարանը և գնում թափւում են Զայենդէրուզը:

Բնակիչները եկւորներ են, որոնք գաղթել են Հին—Ջուղայի գիւղերից 1606 թւին, Շահ-Աբբասի ձեռքով. նրանք բարձրահասակ, քաջ և աշխատասէր ժողովուրդ են. պարպում են երկրագործութեամբ, անասնապահութեամբ և մի փոքր էլ այգեմշակութեամբ: Սակայն գիւղը դրսի աշխարհից կտրւած լինելով, մնացել է ճակատագրին յանձնւած և մինչև այսօր զրկւած է եղել քաղաքակրթութեան բոլոր բարիքներից: Այժմ բաղկացած է 80 տնից 638 շնչով, որի 364-ը արական է և 274-ը իգական: Գիւղը շատ նեղւածք է. այդտեղ փողոցները անկանոն են և տները միմեանց կպած:

Հողատիրութեան ձևն «առբար»ի—կալւածատիրական է. պատկանում է Մամթաղի, Զաֆէր-Ղուլի, Աբբաս-Ղուլի խաներին և Յարութիւն Խաչիկեանի ժառանգներին\*: Գիւղացիներից միայն եօթը տուն հող ունեն, իսկ մնացեալները հողազուրկ են. նրանք մշակում են աղանների հողերը և բերքի  $\frac{1}{3}$  մասը տալիս են նրանց. մօտաւորապէս վճարում են 576 բեռ ցորեն և գարի, 216 թուման էլ փող: Բայց գիւղացիներն անտէր լինելով և գիւղում բացակայելով հաստատ

\* Նոր—Ջուղայի Ս. Սաեփաննոս եկեղեցին ևս մի հարթայ հող ունի այս գիւղում: